

Romanisch

50 onns Uniun da musica Sagogn

En ses 50 onns d'existenza ha l'Uniun da musica da Sagogn menau numerusas gadas in til festiv atras il vitg. Ils 4 e 5 da zercladur 2011 ei quei puspei stau il cass. Quella gada han la populaziun engraziau alla musica per ses numerus survetschs cun ina gronda ed originala participaziun al til da giubileum. Tuns, colurs e bia buna luna ein stai el center dalla gronda festivitad. AUGUSTIN BEELI



La musica giubilonta el til festiv: En sia historia ha l'Uniun da musica embelliu nundumbrevilas fiastas e procurau per muments positivs enteifer la cuminonza dil vitg.

ILS 4 E 5 DA ZERCLADUR 2011 ha giu liug a Sagogn ina gronda fiasta dil vitg. L'Uniun da musica ha commemorau dignamein siu 50avel anniversari. Cu la musica da Sagogn seigi vegnida fundada, aravien ils purs aunc cun bos, targevien ins ils pons-fein da clavau en e la mumma fagevi sil pli ina gada il meins paun-casa, ha il oratur festiv Martin Mathiuet manegiau en siu plaid. Il menader digl CCM a Laax ha tratg in larg artg denter la fundaziun dalla musica da Sagogn ils 1961 ed il temps modern. «Co il mund, nies mund, ei semidaus en quels 50 onns», ha el fatg persenn enviers igl auditori ella tenda da fiasta amiez il vitg da Sagogn. L'idea e 'impurtonza dalla musica dil vitg seigien restai, ellas hagian ed havevien effect positiv sil singul e silla

cuminonza, ha Martin Mathiuet manegiau. Quella cuminonza han ins sentiu specialme in connex culla fiasta da giubileum ch'il comite d'organisaziun cun Enrico Arpagaus alla testa haveva preparau. Mintga casada dil vitg e bunamein tuts 660 habitonts dalla vischnaunca ein s'engaschai en ina moda ni l'autra per quella fiasta.

Punct culminont ei il grond til staus. Tuttas uniuns e gruppaziuns dil vitg han rendiu honor alla musica. En biaras uras da preparaziun haveva l'uniun da dunnas cun sias bunamein 60 commembras semtgau in solver da purs genuin. Ils chors baselgia reuni ed il chor viril cun tshunconta cantaduras e cantadurs han embelliu musicalme in igl eveniment dalla dumengia endamaun. Suentar gentar ha in

pievelun da lunsch e da maneivel assistiu al til atras il vitg. Denter ils hospes e gratulants han ins engartau il schef dalla cultura grischuna, cusseglier guvernativ Martin Jäger, lu cusseglier naziunal Sep Cathomas, ils presidents communalas dalla vischnaunca vischinontas Toni Camathias, Laax, Silvia Casutt, Falera, e Bruno Wellinger, Schluain.

A caschun digl act festiv ella tenda ha giu liug la honoraziun dils veterans dall'Uniun cantunala da musica dil Grischun. Siu president, Robert Casanova, ha gratulau a nov veterans cantunals per 25 onns commembradi activ en ina societad e siat veterans federalas per 35 onns commembradi.